

Al torne MAMAN!

Ai 12 di Otubar e tache la tierce stagjon dal program pai fruts dut in lenghe furlane coprodusût de ARLeF e di Telefriuli

Dopo il grant sucès des edizions stadis, di **vinars ai 12 di Otubar** al torne **Maman!**, pal divertiment dai plui piçui.

L'apontament al è dopli: la tierce stagjon de **trasmission televisive dute par furlan**, risultât di **une coproduzion de ARLeF (Agjenzie Regjonâl pe Lenghe Furlane) e di Telefriuli**, e tache vinars aes 17.45, cun replichis il miercus e la domenie. Condutoris e coautoris de stagjon televisive a son di gnûf **Daria Miani**, cognossude e une vore preseade no dome dai telespetatôrs plui zovins di Maman!, e la atore **Chiara Donada**. Insieme a intratignaran i fruts cun zûcs, curiositâts e contis bielonis, compagnadis des cjançons originâls scritis di Daria Miani e metudis in musiche di Flaviano Miani. Cun lôr a tornin ancje lis aventuris di Tui e Tuie, che a àn apassionât i piçui spetatôrs te stagjon passade. Protagoniscj dal carton animât a son doi gjatuts cetant ninins, ma un pôc pastrocjans. Si trate di une serie che è à vût cetant sucès – lade in onde in Australie e in Gnove Zelande su Disney Channel – che e je stade dopleade di pueste par furlan. La regjie de trasmission televisive e je di Tommaso Ravo, e il coordenament gjenerâl di Vittorio Vella.

Invezit, il secont apontament al è, simpri ducj i vinars, cu la **pagjine Maman!** sul setemanâl **Il Friuli**. Daspò de polse estive, la edizion su cjarte di Maman! – nassude in colaborazion cu la ARLeF tal mês di Dicembar stât e ancje chê dute in lenghe furlane - e torne cuntune grafiche gnove e plasevule, siore di zûcs, curiositâts, filastrocjis, sugjeriments pe leture e, sigûr, ancje cu lis gnovis aventuris di Vigji, il gjat che in dutis lis trasmissions tv i ten compagnie a Daria Miani.

Midiant dal divertiment, de narazion e dal zûc, l'obietîf comun des dôs “musis” di Maman! al è chel di meti in contat i fruts cul plurilinguism e i siei vantaçs cognitîfs comprovâts che a vegnin dal doprâ plui lenghis in de etât plui tenere.

Udin, ai 11 di Otubar dal 2018

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<